

16 JANUARI 2023



PENDUDUK Orang Asli di Kampung Tual A, Pos Sanderut hidup dalam ketakutan selepas gajah menceroboh kampung mereka.

SUSULAN SERANGAN MAUT GAJAH

Buat unggun api setiap malam

Oleh Mohd Rafi Mamat
am@metro.com.my

Kuantan

Membuat unggun api setiap malam antara kaedah boleh dilakukan penduduk Orang Asli di beberapa kampung kecil di Pos Sanderut dan Pos Betau, Lipis di sini, bagi menghalang gajah daripada masuk ke dalam kampung untuk mencari makan.

Pengarah Jabatan Perlindungan Hidupan Liar dan Taman Negara (Perhilitan) Pahang, Rozidan Md Yasin berkata, penduduk juga dinasihatkan tidak keluar waktu malam untuk ke kebun menunggu durian yang kini sedang gugur.

Menurutnya, gajah aktif pada waktu malam untuk mencari makan dan sekiranya terserempak dengan penduduk, haiwan berken-



Bagi mereka yang tetap ingin ke kebun untuk memungut hasil, mereka perlu pergi secara berkumpulan selain membuat tinjauan terlebih dahulu"

Rozidan Md Yasin

an boleh bertindak menyerang tanpa disangka.

Katanya, bagi mereka yang tetap ingin ke kebun untuk memungut hasil, mereka perlu pergi secara berkumpulan selain membuat tinjauan terlebih dahulu dalam kawasan dan sekitarnya.

"Sekiranya terserempak dengan gajah mereka perlu segera lari dan bersembunyi di belakang batu atau pokok

besar, jangan membuat bising serta bunyian selain cuba mengambil gambar termasuk menghalau kerana cara itu dapat menarik perhatian haiwan berkenaan.

"Saya juga berharap penduduk dapat segera melaporkan kepada Perhilitan atau tok batin sekiranya mengetahui kehadiran gajah di kampung mereka," katanya, dihubungi di sini, semalam.

Beliau berkata demikian mengulas berikutan kejadian seekor gajah jantan menyerang hingga menyebabkan kematian remaja Orang Asli, Andy Yok Manin, 15 di Kampung Tual B, Pos Sanderut, Isnin lalu.

Kumpulan gajah berkenaan dipercayai turut menyerang dengan memijak hingga menyebabkan kematian seorang wanita Orang Asli di Kampung Simoi Baru, Pos Betau pada 7 Disember tahun lalu.

Rozidan berkata, pihaknya kini giat berusaha untuk menangkap dan memindahkan haiwan berkenaan secepat mungkin namun sehingga kini usaha menjelaknya masih lagi gagal dilakukan.

"Usaha menjejak gajah berkenaan yang bergerak sendirian akan dilakukan sehingga Khamis depan dengan menumpukan di beberapa tempat di Pos Sanderut dan kawasan berhampiran.

"Penjejakan akan dibuat setiap hari berdasarkan kesan terbaru yang ditemukan kumpulan peninjau dan maklumat daripada penduduk.

"Jarak penjejakan dianggarkan antara 10 hingga 20 kilometer setiap hari, bergantung kepada jejak yang ditinggalkan haiwan berkenaan," katanya yang berharap penduduk bersabar.